

ياسر نجم يكتب عن مصائب الانقلاب بسبب الأزمة الروسية



الخميس 25 ديسمبر 2014 12:12 م

الناشط السياسي د. ياسر نجم ، عبر فيس بوك :

شوف يا مؤمن اللفة بتلف ازاي ومربوطة بخيط ازاي...
أمريكا خفضت سعر البترول علشان توقع الإقتصاد الروسي...
الإقتصاد الروسي لما وقع...روسيا قررت انها توقف تصدير القمح...وتوجه كل الإنتاج للسوق المحلي...بما فيه كل اللي تعاقدوا عليه بالفعل...
مين أكثر بلد هاتتضرب بالموضوع ده ؟
مصر...
(ده كلام رسمي مش تكهنات منى)...
ليه بقى يا سيدي ؟
علشان نص القمح المصري بالظبط بنستورده من روسيا...
يعنى نص احتياجك من القمح والخبز طار...
طب هل احنا كنا طول عمرنا بنستورد نص قمحنا من روسيا !!!؟
بالطبع لأ...
ده كان قرار من السيسي ...علشان يتمجلس لبوتين ويقرص على أمريكا...علشان تدى له الـ 10 طيارات يضرب بيهم سينا...
وقبلها كان 70% من القمح بيبجى من أمريكا...
وده كمان علشان عندنا وزير تموين حمار...كان بيتتريق على سعي مرسى وباسم عوده للإكتفاء الذاتي من القمح...ويقول انه أحسن لنا نبقى أكبر مستورد...وده هايخللى الدول تتنافس على التقارب معانا...علشان نشترى منها...

المهم علشان العلة تبقى علقين...
الموضوع ده أدى لإرتفاع أسعار القمح عند كل المصدرين التانيين...وهاتشترى بدل القمح الروسي بسعر الطاق طاقين...
وعلى العلة تبقى ثلاثة...هاتشترى بعد ما الدولار سعره ولع...وهاتخسر فرق سعر القمح وكمان فرق سعر الدولار...
وعلى العلة تبقى أربعة...الكلام ده جه بعد ما سددت الوديعة القطرية والإحتياطي الأجنبي بتاعك بقى فى الأرض...
وعلى العلة تبقى خمسة...الكلام ده جه بعد ما ضبطت ميزانيتك على كده ومابقاش عندك بند للمصيبة دى...وكمان ابتديت تسحب على المكشوف علشان تدى الناس فوايد قناة السويس...بدون ما المشروع يدر أى إيراد يعوض ده...
طب خذ دى كمان...علشان العلة تبقى ستة...دول الخليج مش هاتدي لك حاجة دلوقتى ببلاش بعد ما سعر البترول وقع...وهم نفسهم بيسحبوا من الإحتياطي الأجنبي بتاعهم...
لو ادوا لك حاجة...هاياخدوا حته من البلد قصادها...ولسه قطر داخلة تاخذ نصيبتها قصاد المصالحة...
أغيبا وخونة ومختوم على قلوبهم وعقولهم...والأهم: إن الله لا يصلح عمل المفسدين...